

19 Aprile.

NOTIZIE

Arivae dal Inferno all'arivo dei Todeschi delle Cariche, dae ai morti, e disposte a quei che gà d'arivar.

Pluton gera in campagna a Orteghele lontan 100 mia da casa del Diavolo. Apena sentia la rivoluzion de Viena, la liberazion de Venezia e de Milan e prevedendo che a miera de sta razza porca sarave andada a star co lu, dove el vol che ghe sia quiete, ubidienza l'à fato taccar la posta, l'è corso a lo so residenza per dar ordene, far cariche, come gera necessario in sta occasion. Arivà a Palazzo e fatto chiamar Checo de ludra memoria sorvegliante dele latrine, dove el sà distinto: Come vala Checo mio, el gà dito, astu sentio cossa te par. Sto povero Pagnoca pianzendo gà risposto. Pur tropo Marinovich me gà dito tuto. El xe arivà, dise Pluton, pur tropo tutto mastruzà. Dove xelo? domanda Pluton. In cusina, el volta el rosto per la corte. Ben, dise Pluton, vederemo; bisogna pensar a chi capiterà, se i xe stai galiotti al mondo, cossa sarali quà. Ma da mi no se scherza, no se me infenochia col Loto, Sal, Tabaco, Carta bolada, Loterie, Imprestanze e tante altre baronae per farse la ponga. Chiamè Ferigheto, Checo de Modena, Maria Luigia, colsulremo e provedemo, no vogio disordini, rivoluzion. Checo sospirando risponde. Caro Ferdinando: Ti geri nato per lavar i piati, no per comandar. La sera i sa raccolto. La mattina xè stà ordinà. — Al'arivo dei Todeschi o' so amici sia alti o bassi sarà fata esata visita se i gà carte, lettere o altro. — Checo resta confermà nel posto de Ispettor ai condoti, dandoghe in assistenza Ferigo, so fio, zovene, capace de sfachinar. — Maria Luigia da custode delle partorienti, passerà in cusina a cuser canevazze. — Checo de Modena da custode del carbon passerà alla visita delle pignate, se le xè nete o sporche. — A custode del carbon passerà Marinovich con obbligo de render conto ogni sera per impedir le magnarie ch'el podesse far. — El posto de sguatero xè riservà a Redeschi che presto capiterà; sotto sguatero a Ferdinando, fachini i membri della Camera Aulica. Tutti i militari todeschi farà parte dela compagnia dei sbirri, conservando i gradi all'ufficialità. Melternich capo dei ladroni, xè destinà a tegrir nota dele spie, ma prima per oto ani el doverà per so castigo voltar el speo fin ch'el rosto sia coto co carte metaliche, coponi, cedole, invece de legne e carbon. Sia subito impiantà el giudizio statario per chi manca al so dover. — Checo ga sbassà la testa, Ferighetto ga fifa, Maria Luigia s'ha messo a rider. L'ordine xè stà eseguiu per i presenti, disposto per i futuri.